



Prouvènço d'aro

Tóuti li mes, lou journau de la Prouvènço d'aro

òutobre de 2014

n° 303

2,10 €

Massilia

Al cap de sèt an ...

... flourira tourna-mai lou lausié.

Eh o! sèt an deja que lou *Massilia Sound System* nous baiavo soun darrié disque, e despièi li membre de soun afeciounado-colo (fan-club en francés!) se desoulavon en silènci.

De segur èro pas lou desert, li membre dóu group nous an baia proun de councert, de disque, un pau cadun de soun coustat, èro bèn... mai èro pas Massilia...!

E vaqui que li membre dóu MSS se soun avisa qu'an coumença de mounta sus lou pountin (pèr nous faire plasé!) en 1984, i'a tout just trento an.

Trento an, lou bèl anniversari, aquéu de l'age adulte!

Mai ousamen pèr nautre, adulte lou soun pas devengu, rèston de jouvènt afeciouna pèr la bono musico, li tèste requist e subre-tout la nosto lengo. De jouvènt plen d'enavans e d'estrabort...!

Ansin se soun trouba pèr festeja li trento an de soun espelido e nous pourgisson tourna-mai — enfin! — un novèu CD.

Un disque emplí de bèlli e bòni cansoun, de ritme galoi, emai de vertadièro pouèsio. Fai plesi peréu d'entèndre de tèste ounte s'avisan que lou group èi resta fidèu à sis idèio d'avans, soun besoun e sa set de libèrta, de fraternita.

Escoutas aquéu novèu disque, vous fara passa de bon moumen, vous levara lou làngui e vous baiara tourna-mai fisanço en l'aveni.

Ansin poudèn dire gramaci à Tatou, Gari grèu, Papet J. emai Blu, Kayalik e Janvié; nous baion tourna-mai joie e enavans. Soun darrié CD èro pareigu au siècle passa, souvetan qu'après aquéu esperaran pas lou siècle 22en pèr nous n'en pougi un autre ... ! Aquéu novèu album sourtira lou 21 d'òutobre.

"Massilia" pèr Massilia Sound System.

publica pèr *Manivette records*

14 cansoun d'uno durado toutalo de 50 min. Se trobo eisa vers li discaire, emai lou poudès coumanda direitamen vers :

Manivette Records - 7 rue Henri Diffonty - 13600 La Ciotat) em'un chèque de 19 èuro mandadis coumprés à l'ordre de Manivette records.

J-M. Courbet

Massilia Sound System saran en councert :

- 10 d'òutobre à Perpignan (66).
- 16 d'òubre à Marsiho pèr la Fiesta des Suds.
- 23 d'òutobre à Tournefeuille (31).
- 24 d'òutobre à Limoge (87).
- 25 d'òutobre à Andard (49).
- 7 de novèmbre à Carpentras (84).
- 8 de novèmbre à Narbouno (11).
- 13 de novèmbre à Tarbo (65).
- 14 de novèmbre à Biarri (64).
- 15 de novèmbre à Eysines (33).
- 21 de novèmbre à Rignac (12).
- 27 de novèmbre à Velleurban (69).
- 28 de novèmbre à Bour-lès-Valence (26).
- 29 de novèmbre à Mounestié-li-ban (05).
- 5 de desèmbre à Paris (Cabaret Sauvage)

Massilia Sound System



La Charto éuropenco di lengo regiounalo

Se n'en sian pas gaire avisa, mai i'a d'elei-cioun que se fan e se van acaba pèr elegi de novèu senatour. Es pas nous-autre que poudèn chausi demoucraticamen au sufrage universau, aquéli parlamentari s'elegisson en famiho, quási entre éli, li grands eleitour que se dison. Dins chasco circouscripcioun lou vote es reserva à-n-un coulège eleitourau fourma de deputa, counseié regiounau, counseié departamentau e counseié municipau. Lou mode d'escutin es diferènt segound lou nombre de senatour à elegi dins la circouscripcioun. Quand i'a pas mai de tres senatour à elegi se pren l'escutin uninouminau à dous tour, quand n'i'a mai de tres es l'escutin proupciounau que s'aplico. Es li "Master Chèfe" de la cousino eleitouralo coume se vèi aro à la televisioun. Basto! La baiasso, aquí, dèu èstre bono, i'a

1719 candidat que se presènton pèr soulamen 178 sèti de senatour à nouma.

Lou Senat es renouvelable pèr mita tóuti li tres an e ié sian.

Bèn segur restan à l'agachoun, es aquéu bèu mounde qu'aura de reprene lou doursié manda pèr l'assemblado nacionalo au Senat lou 28 de janvié passa, la proupcioun de lèi coustituciounalo autoursant la ratificacioun de la Charto éuropenco di lengo regiounalo vo minouritari voutado pèr li deputa. Se saup que li senatour soun pas tant jouine que li deputa, e van plan... Aquéu doursié que tirasso despièi nòu mes, lou faudra ana trouba pèr lou desficela e belèu lou desbrida de soun estajo d'estagiero dins lou cafoucho di croto dóu Senat.

Li novèu senatour auran pièi, se s'emparon tant lèu dóu doursié, de decida dins quento

coumessioun van estudia aquel affaire lenguisti, éli, que de lengo e de barjo n'en mancon pas auran pas de peno de lou dire. La Coumessioun de la cultura, de l'educacioun e de la coumunicacioun sarié touto troubado, mai adeja d'uni voudrien fisa acò à la Coumessioun di lèi, ço que fai que pèr countenta tout lou mounde e perdre un pau mai soun tèms, soun capable de crea un Coumessioun especifico.

I'a trento-dous an qu'aquelo Charto es estado adótado pèr lou Counsèu de l'Éurope, quinge an qu'es esta signado pèr la França, e sian toujour aquí à bataia...

Li novèu senatour saran belèu pas tant mouligas... de tout biais li faudra pas leissa s'endourmi sus noste doursié...

Bernat Giély

Acamp dóu Forum d'oc

Li grand mouvamen de defènso de nosto lengo se van trouba à La Faro ...

Pajo 2

Gerard Carrodano

Lou pescaire de bèsti vivènto, lou qu'a founda "Aquapassioun" ...

Pajo 6

XIen Coungrès internaciounau

Coungrès Internaciounau d'Estudi ócitan à Lheida en Catalougno ...

Pajo 12